

МЕСЯЦА СЕПТЕМВРИЯ В 1-Й ДЕНЬ

НАЧАЛО ИНДИКТА, СИРЕЧЬ НОВАГО ЛЕТА. И ПРЕПОДОБНАГО ОТЦА НАШЕГО СИМЕОНА СТОЛПНИКА И АРХИМАНДРИТА И МАТЕРИ ЕГО МАРФЫ. И СВЯТЫХ МУЧЕНИЦ 40 ЖЕН И СВЯТАГО АММУНА ДИАКОНА, УЧИТЕЛЯ ИХ

ВЕЧЕР

Блажен муж: 1-й антифон; аще же в субботу, стихословим кафисму всю.

На Господи, воззвах: поставим стихов 10 и поем стихиры индикта 3. Глас 1.

Подобен: Небесных чинов:

Самословнаго и Божественнаго учения Христова * молитве научившися, * на всяк день возопиим Зиждителю: * Отче наш, Иже на Небесех обитай, * насущный хлеб подавай нам, * презирая наша прегрешения.

Иже на Синайстей горе * скрижали написав иногда, * Сам и ныне во граде Назарете по плоти * книгу приял еси пророческую почести, Христе Боже, * и, сию согнув, учил еси люди * исполниться Писанию о Тебе.

Якоже евреев телеса в пустыни иногда, * не покорившихся истинно Тебе, всех Владыце, * достойно падоша, * тако и ныне кости разсыпали * злочестивых и неверных агарян, * псаломски, при аде, Христе.

Ины стихиры преподобнаго, глас 5.

Подобен: Преподобне отче:

Преподобне отче, * аще бы возможно столпу вещати, * не бы престал вопити твоя болезни, * труды и рыдания. * Но он носимь бяше, неже ношаше, * яко древо, напаяемо слезами твоими. * Удивишася Ангели, учудишася человецы, * устрашишася демони терпения твоего, * Симеоне преподобне, * моли спастися душам нашим.

Преподобне отче, * силою Божественнаго Духа * Владыце твоему подобяся * на столп вшел еси, яко на Крест. * Но Он рукописание всех растерза, * ты же востания страстей разрушил еси, * Он яко овча, ты же яко заколение, * Он взыде на Крест, ты же на столп, * Симеоне преподобне, * моли спастися душам нашим.

Преподобне отче, * тело омочив слезами * и душу очистив, * на высоту возшел еси добродетелей; * чувственное убо жилище имея столп твой, * мысленный же и Небесный град горний Сион, * Ангелы удивил еси, человеки ужасил еси, * демоны посрамил еси добродетельми твоими, * Симеоне преподобне, * моли спастися душам нашим.

Другия стихиры святаго, глас 2, самогласны:

От корене благаго благий прозябе плод, * от младенства священный Симеон * благодатию паче неже млеко воспитан, * и, на камень тело возвысив, * к Богу же превозвысив разум, * Небесное созда добродетельми жилище, * и, с божественными Силами ликовне шествуя, * Христа бысть жилище, * Бога и Спаса душ наших.

Память твоя во век пребывает, * преподобне отче Симеоне, * и кротость сердца твоего, угодниче Христов блаженне. * Аще бо и преставился еси от нас, пастырю добрый, * но не отступаеши от нас духом, * в любви Богу предстоя * и со Ангелы ликуя на Небесех, * с нимиже моли спастися душам нашим.

Киприаново: Мощей твоих рака, всехвальне отче, * источает исцеления, * и святая твоя душа, со Ангелы совокупльшия, достойно радуется. * Имея убо ко Господу, преподобне, дерзновение * и со безплотными ликуя на Небесех, * с нимиже моли спастися душам нашим.

Германово: Возлюбил еси, богоносе, горнейшее любомудрие, * и вне мира был еси, * живой вышше видимых, * и зеркало нескверно Божие божественно показался еси, * и, сый присно соединяся Свету, * Свет принимал еси, * и яснейший, блаженне, получил еси конец. * Молися о душах наших, мудре Симеоне.

Слава, глас 6. Германово:

Божественная благодать * осеняет раку мощей твоих, * освященный Симеоне, * темже и, в воню мира чудес твоих притекающе, * недугов исцеление почерпаем. * Но, отче преподобне, * Христа Бога моли о душах наших.

И ныне, индикта, глас тойже. Византиево:

Иже со Духом Святым соединен, * Безначальне Слове и Сыне, * всех видимых и невидимых Содетелю и Зиждителю, * венец лета благослови, * сохраняя в мире православных множества * молитвами Богородицы и всех святых Твоих.

Таже вход, прокимен дне, и чтения.

Пророчества Исаиина чтение (глава 61):

Дух Господень на Мне, Егоже ради помаза Мя, благовестити нищим посла Мя, исцелити сокрушенныя сердцем, проповедати пленником отпущение и слепым прозрение, проповедати лето Господне приятно и день воздаяния Бога нашего, утешити вся плачущия, дати плачущим Сион, славу вместо пепела, помазание веселия плачущим, одеяние славы вместо духа уныния, и нарекутся роди правды, насаждение Господне в славу. И созиждут пустыни вечныя, запустевшия прежде воздвигнут, и обновят грады пустыя, запустевшия от рода в род. И приидут инороднии, пасуще овцы Твоя, и иноплеменницы ратаи, и виноградари ваши, Вы же священницы Господни наречетесь, служителие Бога вашего. Речется вам: крепость языков поясте и в богатстве их чудни будете, вместо стыдения вашего сугубаго и вместо срамоты, возрадуется часть их. Сего ради землю свою вторицею наследят, и веселие вечное над главою их: Аз бо есмь Господь, любяй правду и ненавиждяй хищения от неправды. И дам труд их праведником и Завет вечен завещаю им. И познается во языцех семя их, и внуцы их посреде людей. Всяк видяй их познает я, яко сии суть семя, благословенное от Бога, и веселием возвеселятся о Господе.

Левитских книг чтение (глава 26):

Глагола Господь сыном Израилевым, глаголя: аще в повелениях Моих ходите, и заповеди Моя сохраните, и сотворите я: и дам вам дождь во время его, и земля даст рождения своя, и древа польная отдадут плод свой. И постигнет вас млечение, обрание вина, и вина обрание постигнет сеяत्व, и снесите хлеб ваш в сытость, и вселитесь с твердостью на земли вашей. И дам мир в земли вашей, и уснете, и не будет вас устрашай. И погублю звери лютыя от земли вашей, и брань не пройдет сквозе землю вашу. И поженете враги ваша, и падут пред вами убиени. И поженете пять из вас сто, и сто вас поженете тьмы. И падут врази ваши пред вами мечем. И призрю на вы, и возблагословлю вы, и возвращу вы, и умножу вы, и положу завет Мой с вами. И снесите ветхая и ветхая ветхих, и ветхая от лица новых изнесете. И положу завет Мой в вас, и не возгнушается душа Моя вами. И похожду в вас и буду

вам Бог, и вы будете Мне людие. Аще же не послушаете Мене, ниже сотворите повелений Моих сих, но ни покоритесь им, и судеб Моих вознегодует душа ваша, якоже вам не творити всех заповедей Моих и яко разорити завет Мой, и Аз сотворю сице вам: наведу на вы скудость, и сеете вотще семена ваша, и изъядят труды ваша противнии ваши. И поставлю лице Мое на вы, и падете пред враги вашими, и поженут вы ненавидящии вас, и побегнете, никомуже гонящу вас. И сокрушу досаждение гордыни вашея, и положу небо вам яко железно и землю вашу яко медяну. И будет вотще крепость ваша, и земля ваша не даст семене своего, и древа сельная не дадут плода своего. И пошлю на вы звери дивия земныя, и поядят вас, и потребят скоты ваша, и умалены сотворю вы, и погубит вы находяй меч. И будет земля ваша пуста: и двори ваши будут пусты, яко вы ходисте ко Мне строною, и Аз пойду к вам в ярости строною: глаголет Господь Бог, Святой Израилев.

Преподобнаго:

Премудрости Соломоновы чтение (глава 4):

Праведник, аще постигнет скончатися, в покои будет: старость бо честна не многолетна ниже в числе лет исчисляется. Седина же есть мудрость человеком, и возраст старости житие нескверно. Благоугоден Богу быв, возлюблен бысть, и живый посреде грешник преставлен бысть, восхищен бысть, да не злоба изменит разума его или лесь прельстит душу его. Рачение бо злобы помрачает добрая, и парение похоти пременяет ум незлобив. Скончався в мале, исполни лета долга, угодна бо бе Господеви душа его, сего ради потщася от среды лукавствия. Людие же видевши и не разумевши, ниже положивши в помышлении таковое, яко благодать и милость в преподобных Его и посещение во избранных Его.

На стиховне стихиры индикта, глас 1.

Самогласны, Иоанна монаха:

Наста вход лета, * созывающ почитати того просвещающия, * Каллисту, Евода и Ермогена, * самообратныя страдальцы, * Симеона равноангельнаго и Исуса Навина, * иже во Ефесе седмочисленныя отроки * и четверодесятосветлый святых жен лик. * Ихже памятем приобщающесе, празднолюбцы, возопиим благочестно: * Господи, благослови дела рук Твоих * и сподоби ны добре преити лета обхождение.

Стих: Тебе подобает песнь, Боже, в Сионе, * и Тебе воздастся молитва во Иерусалиме.

Христе Боже наш, Иже мудростию вся содеявый * и из не сущих во еже быти приведей, * благослови венец лета, * и грады наша сохраняй невредны, * и верныя люди силою Твоею возвесели, * победы дая на сопостаты, * Богородицы ради, * даруя миру велию милость.

Глас 2:

Стих: Исполнимся во благих дому Твоего, * свят храм Твой, дивен в правде.

Киприаново: Дивен еси, Боже, и чудна дела Твоя, * и путие Твои неизследими: * еси бо Мудрость Божия, и Ипостась совершенна, и Сила, * Собезначален же и Соприсносущен, * и содетельною всесильною властию в мир пришел еси, * ища еже удобрити создание Твое, * неизреченне от неискусомужных Матере, не превращся Божеством, * завещав уставы и лета * во спасение наше неизменне. * Сего ради вопием Ти: * Благий Господи, слава Тебе.

Стих: Благословиши венец лета * благодати Твоя, Господи.

Дамаскиново: Иже в мудрости вся содетельствовавый, * Превечное Слово Отчее, * и всяческую тварь всесильным словом Твоим составивый, * благослови венец лета благодати Твоя * и ереси низложи, Богородицы ради, * яко Благ и Человеколюбец.

Слава, святого, глас 5:

Преподобне отче, * добру избрел еси лествицу, * еюже возшел еси на высоту, * юже обрете Илия колесницу огненну, * но он убо восхода иным не остави, * ты же и по смерти имаши столп твой. * Небесный человеке, земный Ангеле, * светильниче неусыпный вселенная, * Симеоне преподобне, * моли еже спастися душам нашим,

И ныне, индикта, глас тойже.

Иоанна монаха: Ты, Царю, сый присно * и пребывай и во веки безконечная, * приими моление грешных, просящих спасения, * и подаждь, Человеколюбче, земли Твоей благоплодие, * благорастворены воздухи даруя, * споборствуй на безбожия варвары, * якоже иногда Давиду, * яко приидоша сии во обители Твоя * и всесвятое место оскверниша, Спасе, * но Ты даруй православным христианом победы, Христе Боже, * молитвами Богородицы, * Победа бо Ты православных и Хвала.

Тропарь индикта, глас 2:

Всея твари Содетелю, * времена и лета во Своей власти положивый, * благослови венец лета благодати Твоя, Господи, * сохраняя в мире люди и град Твой, * молитвами Богородицы, и спаси ны.

Слава, преподобного, глас 1:

Терпения столп был еси, * ревновавый праотцем, преподобне, * Иову во страстях, Иосифу во искушениях, * и бесплотных жительству, сый в телеси, * Симеоне, отче наш, * моли Христа Бога спастися душам нашим.

И ныне, Богородицы, глас тойже:

Радуйся, обрадованная Богородице Дево, * пристанище и предстательство рода человеческого, * из Тебе бо воплотися Избавитель мира, * едина бо еси Мати и Дева, * присноблагословенная и препрославленная, * моли Христа Бога мир даровати всей вселенной.

НА УТРЕНИ

На Бог Господь: тропарь индикта глас 2:

Всея твари Содетелю, * времена и лета во Своей власти положивый, * благослови венец лета благости Твоея, Господи, * сохраняя в мире люди и град Твой, * молитвами Богородицы, и спаси ны. [Дважды]

Слава, преподобнаго глас 1:

Терпения столп был еси, * ревновавый праотцем, преподобне, * Иову во страстях, Иосифу во искушениях, * и бесплотных жительству, сый в телеси, * Симеоне, отче наш, * моли Христа Бога спастися душам нашим.

И ныне, Богородицы глас тойже:

Радуйся, обрадованная Богородице Дево, * пристанище и предстательство рода человеческого, * из Тебе бо воплотися Избавитель мира, * едина бо еси Мати и Дева, * присноблагословенная и препрославленная, * моли Христа Бога мир даровати всей вселенней.

По 1-м стихословии седален индикта, глас 4.

Подобен: Удивися Иосиф:

Яко Владыце всех и Подателю благих, * Тебе припадаем верно, вопиюще прилежно: * от Твоего умоляем благоутробия, Спасе, * и молитвами Рождшия Тя и всех присно благоугождающих Тебе, * лето благоприятно принести Тебе, яко Благ, сподоби, * во дву существу чествующих и верно славящих Тя.

Слава, преподобнаго, глас 8.

Подобен: Премудрости:

Крест Господень возьм, мудре, * и Тому до конца последовав, * умом не возвратился еси в мир, богомудре, * воздержанием и труды страсти умертвив, * и храм уготовил еси себе Господу твоему. * Темже и дарований возмездие приял еси, * исцеляти недужныя и духи отгонити, * Симеоне преподобнейший, * моли Христа Бога грехов оставление подати * празднующим любовию святую память твою.

И ныне, индикта: Яко Владыце всех: зри выше.

По 2-м стихословии седален, глас 8.

Подобен: Премудрости:

Воздержанием, и труды, и молитвами душу твою обучив боголепне, * был еси сопричастник мучеником, блаженне, * и чудес истинно дарования приял еси, * исцеляти недуги верою чествующих тя. * Темже и демонския отгоняеши полки, * на сия свыше властью данною тебе, Симеоне преблаженне, * моли Христа Бога согрешений оставление даровати * празднующим любовию святую память твою.

Слава, глас 4,

Подобен: Скоро предвари;

Вошла еси в подвиг мучения верно, Каллисто, * проповедающе со двема братья Христа Бога нашего, * желанием бо воспитана, мысленныя сосуды истинно Христовы Церкви совершила еси сих. * Темже сочеталася еси им, мученице, в выпшнюю жизнь.

И ныне, Богородичен:

Скоро приими, Владычице, мольбы наша * и сия принеси Твоему Сыну и Богу, Госпоже Всечистая, * разреши обстояния к Тебе притекающих, разруши наветы и дерзости, Дево, * ныне вооружающихся на рабы Твоя.

Аще есть храм преподобнаго Симеона, по полиелеи седален преподобнаго, глас 8.

Подобен: Премудрости:

Превозшел еси верою, отче мудре, * и, привременная вся презрев, * Христу последовал еси силою духа, * воздержанием истаил еси тело твое, преподобне, * Небесную славу присно провидя. * Темже и обрел еси к восходу божественному столпа лествицу, * твоего желания приличну, Симеоне священнейший. * Моли Христа Бога согрешений оставление даровати * празднующим любовию святую память твою.

Слава, глас 5.

Подобен: Собезначальное:

Воздержанием житие твое украсил еси, * умертвив тело твое, в ничтоже обратил еси вражия прилоги, * отче блаженне, * и преставился еси к Богу в вечную жизнь, * яко достоин наследник. * Темже не престай моляся помиловатися душам нашим.

И ныне, Богородичен:

Пресвятая Дева, нас помилуй, * прибегающих верою к Тебе, Благоутробней, * и просящих теплаго Твоего заступления. * Можеши бо, яко Благая, всех спасти, * яко сущи Мати Бога Вышняго, * Матерними Твоими мольбами * присно умоляющи, Богоблагодатная.

Степенна, 1-й антифон 4-го гласа.

Прокимен и Евангелие храма.

По 50-м псалме стихира храма.

Каноны 3.

Индикта, со ирмосом на 6, ирмос по дважды, тропари на 4. Творение кир Иоанна монаха. Глас 1,

Песнь 1

Ирмос: Поим, вси людие, * от горькия работы фараони Израиля Изменьшему * и во глубине морстей ногами немокрыми Наставльшему * песнь победную, * яко прославися.

Воспоим вси Христу, Имже составишася всяческая и в Немже совершишася неразлучна, яко из Безначальнаго рождшуся Бога Отца Ипостасному Слову, песнь победную, яко прославися.

Воспоим вси Христу, отчим благоволением явльшуся из Девы и проповедавшу лето Господне приятно нам на избавление, песнь победную, яко прославися.

В Назарет пришед, Податель Закона в день субботный учаше, законополагая евреем пришествия Своего неизреченнаго, имже, яко Милостив, спасает род наш.

Богородичен: Поюще, вси вернии, предивную Отроковицу, Христа вселенней возсиявшую и радости всяческая исполнившую присносущныя жизни, присно восхваляем, яко прославися.

Ин канон святых жен, на 4, егоже краегранесие: Твердых жен мучениц пою
болезни. Глас 4.

Песнь 1

Ирмос: Отверзу уста моя, * и наполнятся Духа, * и слово отрыгну Царице Матери, * и явлюся светло торжествуя, * и воспою, радуясь, Тоя чудеса.

Твердо на противоборца подвизастесь, мученицы, постом убо первее, второе же кровным страданием, сего ради ваша памяти верою почитаем.

Уязвившесь любовию нас ради Претерпевшаго Крест же и смерть, Сего стопам последоваша святыя жены, плотскую немощь забывше.

Еллинския жертвы и демонская водружения оружием веры низложисте и принесостесь ко храму Небесному, сосуди одушевленнии, мученицы всечестнии.

Богородичен: Укрепльшесь благодатию от Твоя Возсиявшаго утробы, Всенепорочная, отроковицы девы отразиша мук треволение и в след Тебе приведошася, радующесь.

Ин канон преподобнаго, на 4, егоже краегранесие: Приими пение, о Симеоне
всеблаженне. Иоанна монаха. Глас 8.

Песнь 1

Ирмос: Поим Господеви, вси людие, * в мори Чермнем фараона погрузившему, * победную песнь поюще, яко прославися.

Даждь мне, органом языка гнилым, о богоносе Симеоне, песнь тебе плетущему, мольбами твоими знания свет богонаучен.

Познаша мудрость, отче, твою персяне, ефиопляне, индиане, и скифяне, и аравов множество и прославиша Христа, тобою прославляемаго.

Благодати исполнися духовныя, от пастушеских бо станиц, яко Иаков, Давид и Моисей, началовождь словесных явился еси паств, блаженне.

Богородичен: Пречистая Богородице, радуйся, Честная, невместимаго Бога во утробе Твоей вместившая, избавитися лютых испроси поющим Тя.

Катавасия: Крест начертав, Моисей * впрямо жезлом Чермное пресече, * Израилью пешеходящу; * тоже обратно фараоновым колесницам, * ударив, совокупи, * вопреки написав непобедимое оружие. * Тем Христу поим, Богу нашему, яко прославися.

Поем и до отдания Честнаго Креста.

Песнь 3

Ирмос: Утверди мене, Христе, * на недвижимом камени заповедей Твоих * и просвети мя светом Лица Твоего: несть бо свят паче Тебе, Человеколюбче.

Утверди, Блаже, егоже насади любовию на земли десница Твоя, плодовит виноград, сохраняя Твою Церковь, Всесильне.

В делех духовных богокрасных красящихся наставшее, Господи, лето сие преведи, Владыко, иже верою Тя песнословящия, Боже всяческих.

Тихий ми, Христе, летный круг давай, Щедре, и насыти мя словес Божественных Твоих, яже явился еси глаголя иудеем в субботах.

Богородичен: Яко едину преестественно паче человека благодать во Твою утробу приемшую и невращно рождшую Христа Бога нашего, присно Тя славим.

Ин

Ирмос: Лук сильных изнеможе, * и немощствующии препоясашася силою, * сего ради утвердися в Господе сердце мое.

Крепостию всеильною укрепляеми, противоборцев попрасте силу, сего ради яко победоносицы от Христа венчаетеся.

Явишася зверская зияния Божественною силою Христовою недействена: и избавистеся, богоносицы, невредимы, Бога почитающе.

Воззрением к Богу обожаеми, многобожия хлад отринуте и к теплоте вышния славы, страстоносицы, достигосте.

Богородичен: Знающе благочестно, проповедаем Тя всеистинную Божию Матерь, Всенепорочная: Тобою бо нам Создатель приобщитися сподоби.

Ин

Ирмос: Страх Твой, Господи, * всади в сердца раб Твоих * и буди нам утверждение, * Тя во истине призывающим.

Скоро избег зимняя беда духов, ко спасительней устремился еси обители, Симеоне, из неяже и нестареемую жизнь приял еси.

Приклонил еси, радуясь, покорливый слух твой, всеблаженне, Владыце блажащу и блаженную обрел еси жизнь.

Слова прием семена сердца твоего браздами и слез напоении, Христу умножен клас добродетелей пожал еси.

Богородичен: Неизреченно зачала еси, Богоневесто, Спаса и Господа, избавляющаго ны от лютых, Тя во истине призывающия.

Катавасия: Жезл во образ тайны приемлется, * прозябеннем бо предразсуждает священника; * неплодящей же прежде Церкви, * ныне процвете Древо Креста, * в державу и утверждение.

Кондак индикта, глас 2:

В Вышних живый, Христе Царю, * всех видимых и невидимых Творче и Зиждителю, * Иже дни и нощи, времена и лета сотворивый, * благослови ныне венец лета, * соблюди и сохрани в мире град и люди Твоя, * Многомилостиве.

Таже седален индикта, глас 8.

Подобен: Премудрости:

Иже времена плодоносна * и дожди с небесе подая сущим на земли, * и ныне, приемля мольбы рабов Твоих, * от всякия избави нужды град Твой, * щедроты бо Твоя истинно на всех делех Твоих. * Темже входы благослови и исходы, * дела исправи в нас рук наших * и согрешений прощение даруй нам, Боже: * Ты бо из не сущих всяческая во еже быти, * яко Силен, привел еси.

Ин седален преподобнаго, глас и подобен тойже:

Земная вся оставив * и в мире сый телесне, * духом был еси Небесный Ангел, * находящия бо страсти умертвив плотию, * Троицы явился еси угодник, блаженне. * Темже недугующих исцеляеши страсти * и словом духи отгоняеши благодатию, * Симеоне преблаженне, * моли Христа Бога согрешений прощение даровати * чествующим любовию святую память твою.

Слава, ин седален святых жен, глас 1.

Подобен: Гроб Твой, Спасе:

Агницы словесныя, * Агнцу и Пастырю приведостеся верно мучением, * течение совершивше и веру соблюдоше. * Тем радостно днесь восхваляем, досточуднии, * священную вашу память, * Христа величающе.

И ныне, Богородичен:

Настави ны на путь покаяния, * уклоняющия присно к злым безпутием * и Препоблагаго прогневающия Господа, Неискусобрачная, Благословенная Марие, * прибежище отчаянных человеков, Божие обиталище.

Песнь 4

Ирмос: Разумех, Всесильне, * Твое смотрение * и со страхом прославих Тя, Спасе.

Начало Тебе лета людие Твои приносят, * ангельскими песньми славословяще Тя, Спасе.

Яко Человеколюбец сподоби наченшим лето и скончати Тебе благоугодно, Христе.

Вседержителю, Едине Господи, лет обхождения, утишив, миру даруй.

Богородичен: Яко пристанище ныне душ наших и тверду надежду, Богородицу вси воспоем.

Ин

Ирмос: Седяй в славе * на Престоле Божества, * во облаце легце, * прииде Иисус Пребожественный * нетленною дланию * и спасе зовущия: * слава, Христе, силе Твоей.

Претерпевше муки и сокрушение тела различными образы, раздробление же удес и опаление, Небесная селения наследовасте, наслаждшеся древа жизни, досточуднии.

Девиц блаженных подвигу удивившася Небесныя Силы, яко врага победиша в женстем естестве, укропляеми силою от Жены Возсиявшаго.

Отвергше мира суету всю, Богу Единому всею душею прилепистеся, тем воздержания болезни и страдания претерпесте, невесты Христовы терпеливыя.

Прекрепкое яко оружие Крест обносяще, к сопостатным противостасте ополчением, со Христом же победу отнесосте, победившим мир силою Божества.

Богородичен: Сниде, яко дождь на руно, во утробу Твою, богоглаголивый древле рече пророк, Всенепорочная, Егоже во дву существу родила еси, Емуже взываем: слава, Христе, силе Твоей.

Ин

Ирмос: Услышах, Господи, слух Твой и убояхся, * разумех дела Твоя * и прославих державу Твою, Господи.

Не на песце, преблаженне, но на глубочайших трудах твоих положив основание воздержания, добродетелей создал еси столп непоколебим.

Вселив тело твое в жилище жестоко, страхом пригвоздил еси духа и жилище наследия божественнаго обрел еси, преподобне.

Укротил еси телесныя сокровенныя страсти, пребогате, в гнои лежа червей, отче, благовоние обрел еси.

По страсти вольней Жизнотворивому Мертвецу подобяся, якоже гробу, рову темному сам себе жива предал еси.

Богородичен: Бога, Егоже родила еси, Пречистая Марие, моли всегда рабом Твоим даровати согрешений прощение.

Катавасия: Услышах, Господи, * смотрения Твоего таинство, * разумех дела Твоя * и прославих Твое Божество.

Песнь 5

Ирмос: От нощи утренююще, поем Тя, Христе, * Отцу Собезначальна и Спаса душ наших: * мир миру подаждь, Человеколюбче.

Исполняяй всяческая благодати, Христе, Ты благорастворением и благоплодием, благословенными венчаемо, многокружное лето рабом Твоим даруй.

Летное воздаяние покажи нам предложение к лучшим, мирное же устройство ведущим Тя, Слове Божий, уподобльшася человеком.

На землю пришел еси, Собезначальне Отцу, пленником отпущение, слепым же прозрение от Отца возвещая и время приятно.

Богородичен: Наша надежды, Богородице Чистая, и наше желание на Тя возлагаем, Милостива нам даждь, Дево, Егоже родила еси.

Ин

Ирмос: Нечестивии не узрят славы Твоея, Христе, * но мы Тя, Единородне, * Отеческия славы Сияние Божества, * от нощи утренююще, * воспеваем Тя, Человеколюбче.

Яко агницы непорочныя, яко жертвы приятныя, Агнцу истинному и Пастырю, мученицы, принесостесь приношения всебогатая и приятна всесожжения.

Умерщвлени бывше телом, ожисте душою, Умертвившему крепость смерти, мученицы, яко уподобльшеся, и Кресту, и смерти, и страсти вольней.

Един разум имуще в телесех многих, Единаго Господа Иисуса, различными ранами стружеми и огнем сожигаеми, исповедаху богомудрыя.

Богородичен: Воздвигни падша мя в рове искушений и управи, Бога Кормчию Рождающая, едина Всенепорочная, первее соединившаго разстоящихся благодатию.

Ин

Ирмос: Просвети нас повелении Твоими, Господи, * и мышцею Твоею высокою * Твой мир подаждь нам, Человеколюбче.

Новаго Даниила, Симеоне, Христос тя показа, из рова бо зверска тя явлением невреждена возврати.

Весь сам себе Господу возложив, слоте¹, и мразу, и зною противным озлоблением обнажился еси.

Новый Моисей и Илия показался еси, единощи чрез всю сороклетнюю пищу приемля во всей жизни твоей, преподобне.

Яко златозарным, Симеоне, монистом, преподобне, ужем облагаемь, небошественник показался еси Божественными крилы.

Богородичен: Моли присно Сына Твоего и Бога нашего, Неискусобрачная Марие Чистая, низпослати нам, верным, велию милость.

Катавасия: **О** треблаженное Древо, * на немже распяся Христос, Царь и Господь, * имже паде дровом прельстивый, * Тобою прельстився, * Богу пригвоздившуся плотию, * подающему мир душам нашим.

Песнь 6

Ирмос: Пророка спасл еси от кита, Человеколюбче, * и мене из глубины прегрешений * возведи, молюся.

Житие начати благоугодно Тебе, Владыко, с летным начинанием нас сподоби.

Дней духовных, в поучении Закона Твоего, покажи исполнены, щедре Спасе, поюция Тя.

Богородичен: Рождающая Господа, Богородице Всенепорочная, избави от бед верою поюция Тя, Пречистая.

Ин

Ирмос: Возопи прообразуя погребение тридневное, * пророк Иона в ките, моляся: * от тли избави мя, Иисусе, Царю Сил.

Разражена и ногами женскими попираема зряци, праматерь божественне радуется, тую лестию из рая первее изгнавшего.

Воздержанием к страданию усердно совокупльшися, Жениху душ ныне нетленне совокупистися и в чертозе Божественном радостною душею водворяется.

Возвышаемая мук сверепая волнения мучениц кораблей потопити не возмогоша: державною бо Рукою к Божественным пристанищем достигоша.

Богородичен: Глаголов Твоих сБытия зряци, возвеличи наипаче, Богомати, Тя Возвеличившаго, роди бо вси Тя ныне истинно ублажают.

Ин

Ирмос: Ризу мне подаждь светлу, * одеяйся светом, яко ризою, * Многомилостиве Христе Боже наш.

Знамений и чудес тя Христос самоделателя показа, Божественнаго, блаженне, действия приятно жилище.

Вознесл еси тело твое, Симеоне, яко на крест, на столп. Тем прославился еси на Древо тебе ради вознесшемуся Христу.

Вышнее шествие обрет, Симеоне чудне, к высоте Небесней поюция ты верно возведи.

Богородичен: Гору, Юже провиде Даниил, из Неяже несекомый Камень веры отсечися, Христос, Тя познаваем.

Катавасия: Воднаго зверя во утробе * длани Иона крестовидно распростер, * спасительную Страсть проображаше яве; * тем, тридневен изшед, * премирное Воскресение прописаше, * плотию пригвожденнаго Христа Бога * и тридневным Воскресением мир просвещшаго.

Кондак преподобнаго Симеона, глас 2:

Вышних ищай, вышним совокупляйся * и колесницу огненную столп соделавый, * тем собеседник Ангелом был еси, преподобне, * с ними Христу Богу * моляся непрестанно о всех нас.

Икос: Симеоново непорочное житие кий язык человекъ довлеет когда к похвале исповедати? Обаче воспою, Божию мудростию, добляго сего исполина страдание же и подвиги, яже на земли, яко светильника явльшася всем человеком, многим терпением в лице ангельством возсиявша, с ними бо поя непрестанно Христу, воздержанием чистоту стяжа, моляся непрестанно о всех нас.

Песнь 7

Ирмос: Отроцы, благочестию совоспитани, * злочестиваго веления небрегше, * огненнаго прещения не убоаяшася, * но, посреди пламене стояще, пояху: * отцев Боже, благословен еси.

Начинающии лето, и песней начаток сотворяем царствующему Христу Царством безконечным, православнии людие, благочестно поюще: отцев Боже, благословен еси.

Сый прежде век, на век же и еще Господь, воспевающим Тя, Христе, Источник благодати, благих Твоих даров лето сие исполни: отцев Боже, благословен еси.

Богородичен: Яко раби Владыце, на молитву Чистую Матерь Твою Тебе предлагаем, Христе, от всякаго обстояния люди Твоя, Блаже, избавити, поющия: отцев Боже, благословен еси.

Ин

Ирмос: Спасый во огни авраамския Твоя отроки * и халдеи убив, * яже Правда праведно уловляше, * препетый Господи, * Боже отец наших, благословен еси.

Коль непобедимо твое мудрование, Аммуне богоносе: ибо, начальник лика дев, мук не убоаялся еси, с ними скончеваяся, яко диакон и таинник Божественныя славы, пел еси: препетый Господи, Боже отец, благословен еси.

Яко невестоводитель мудр, словесы помазуеши мужества, к Жениху взирати и плотския терпети болезни, зовущия мученицы: препетый Господи, Боже отец, благословен еси.

Да не обленимся, се отверзеса тризнице, отроковицы, станем мужески, Христос венцы простирает, тела нашего не пощадим, вопияху доблии на тризнице: препетый Господи, Боже отец, благословен еси.

Богородичен: Благословен Плод благословеннаго чрева Твоего, Егоже благословят Небесныя Силы и человечестии собори, нас Избавльшаго клятвы древния, Благословенная.

Ин

Ирмос: Отроцы благочестивии в Вавилоне * образу златому не поклоняшася, * но, посреде печи огненныя орошаеми, * песнь воспеваху, глаголюще: * превозносимый отцев и нас Боже, благословен еси.

Разрешил еси убо сухоту недоумеющимся, и врата тем дождевныя отверзл еси, и землю колеблющуюся молитвами устави еси, и люди звати научил еси: благословен Бог отцев наших.

Яко величайший светильник церковный и многосветлое, Симеоне, солнце, всюду лучи испущая, просветил еси и люди звати научил еси: благословен Бог отцев наших.

Воды отвсюду стекошася, угодниче Христов, человеков пучина во ограде твоего собрася воздержания, от Тебе вопити наказуеми: благословен Бог отцев наших.

Древле убо старца объятии, скрижальми же твоего сердца, преподобне, невидимую силою Христос упокоися, Симеоне. Темже взывал еси: благословен Бог отцев наших.

Богородичен: Подобаше безсеменно Воплощшемуся из Тебе проити, Дево Чистая, Ты бо явилася еси чистотою всех пребольши, Емуже, вопиюще, песньми зовем: благословен Бог отцев наших.

Катавасия: Безумное веление * мучителя злочестиваго люди поколеба, * дышущее прещение и злохуление богомерзкое; * обаче три отроки не устраши ярость зверская, * ни огонь снедаяй, * но, противодышущу росоносному Духу, * со огнем суще, пояху: * препетый отцев и нас Боже, благословен еси.

Песнь 8

Ирмос: Песнословцы в печи спасшаго дети * и громопламенную преложаго на росу, * Христа Бога пойте и превозносите во вся веки.

Яко Начальнику спасения, Христе, начаток Тебе приносит летный честная Церковь, зовущи: пойте и превозносите Христа во веки.

Из не сущих всяческая мудре обновившаго Создателя и производящаго времен обращения хотением, пойте и превозносите Его во веки.

Изводящему всяческая Богу и времена изменяющему, на многообразное человеков управление, поем: хвалите и превозносите Христа во веки.

Богородичен: Богоматерь Деву Чистую, лет обхожденными же и обращенными, православно, человечестии собори, поем Тя, яко Богородицу и всех спасение.

Ин

Ирмос: Отроки благочестивыя в печи * Рождество Богородичо спасло есть; * тогда убо образуемое, * ныне же действующее, * вселенную всю воздвизает пети Тебе: * Господа пойте, дела, * и превозносите Его во вся веки.

Светлы себе от кровей ризы мученических обложисте, совлекшеся истинно тлеемаго грехами человека и воспевающе: Господа пойте, дела, и превозносите Его во вся веки.

Обильнаго света светолитиями, Солнца мысленнаго Божественными светлостьми, мученицы, освещаеми, ночь претекосте безбожия, поюще единомышлением души: Господа пойте, дела, и превозносите Его во вся веки.

Яко агницы, яко нескверныя юницы, яко божественныя голубицы, яко самовольная заколения, приведостеся, мученицы, Зиждителю, и яко жертвы непорочны, согласно поюще: Господа пойте, дела, и превозносите Его во вся веки.

Повелением мучителей пребеззаконных неправедную подъясте смерть, на уды ссецаеми, палицами сокрушаеми, немилостивне биеми, огнем всежигаеми, мечем посекаеми; тем безсмертная приясте с радостию богатая воздаяния.

Богородичен: Во след Тебе текоша жены, Мира благовоннаго ведуще, Всечестная Богоневесто, едина Неискусобрачная, из утробы Твоей возсиявшаго Единороднаго Сына, и с Тобою царствуют истинно, песнословяще Христа во веки.

Ин

Ирмос: На горе святей прославльшася * и в купине огнем Приснодевы * Моисеови тайну явльшаго, * Господа пойте * и превозносите во вся веки.

От всякаго отлучився пристрастия и матерню немощь ущедрив, яко живей явился еси по смерти: Господа пойте и превозносите Его, вопия, во веки.

Юношу стянул еси расслаблена и одр Филарху повелеваеши на раму нести, священнейше, вопия: Господа пойте и превозносите Его во вся веки.

Благословим Отца и Сына и Святаго Духа, Господа.

Уяснивый Иова страстию, согнивших плоти твоей гнилость в бисер претвори многоценен, тя, Христов угодниче Симеоне, Славяй во вся веки.

И ныне, Богородичен: От Ангела радость приемшую, и рождшую Господа славы, и свет миру возсиявшую, вси Тя поем, Дево Богородице, во вся веки.

Таже: Хвалим, благословим, покланяемся Господеви, * поюще и превозносяще во вся веки.

Катавасия: Благословите, отроцы, * Троицы равночисленнии, * Содетеля Отца Бога, * пойте снизшедшее Слово * и огонь в росу претворшее * и превозносите всем жизнь подавающаго * Духа Всесвятаго во веки.

Иерей же, показив святую трапезу, возгласит:

Богородицу и Матерь Света в песнях возвеличим.

И, показив святой олтарь и всю Церковь, и братию, еже повсегда на 9-й песни утрени не оставляется. Мы же стихословим 9-ю песнь, поюще велегласно, на глас 6: Величит душа моя Господа: Припеваем же: Честнейшую Херувим:

Песнь 9

Ирмос: Образ чистаго рожества Твоего * огнепалимая купина показа неопальная, * и ныне на нас напастей свирепеющую угасити молимся пещь: * да Тя, Богородице, * непрестанно величаем.

Слово Божие и Сила, истинная Мудрость и ипостасная, содержащая и правящая всяческая мудре, и ныне наставшее рабом Твоим время во устроении тисе² произведи.

Вся дела Твоя, Господи, небеса, земля, свет и море, воды и вси источники, солнце же, луна и тьма, звезды, огонь, человецы и скоти, со Ангелы восхваляют Тя.

Един еси Превечный, яко Творец веков, и царствующее триипостасное Единое Божество нераздельное, мольбами Чистыя Богоматере лето плодоносно наследию Твоему покажи.

Богородичен: Спасе всего, и Строителю, и Зиждителю, и Вседержителю твари, мольбами безсеменно Рождшия Тя мир миру Твоему подаждь, соблюдая Церковь всегда немятежну.

Ин

Ирмос: Ева убо недугом преслушания * клятву вселила ест, * Ты же, Дево Богородице, * прозябением чревоношения мирови благословение процвела еси, * тем Тя вси величаем.

Подают исцелений токи требующим, яко от источника Всеблаженныя, уставляют пагубу недугов и страстей отгоняют зной, сердца боголюбивых напаяют к благоплодию божественных деяний.

Божественный диакон Аммуна, Келсина же и к сим сорок божественных и богомудрых жен, пострадавших законно, венчающихся и ныне со Ангелы ликуют, яже по долгу ублажаем.

Вознесостесь, державу на враги взявше, и Ангелом уподобитесь, древа наслаждаетесь невозбранно жизненнаго в раи, богоневесты, источник ныне добрых приясте, о мире молящесь.

Богородичен: Мудрости вместилище паче ума лучшаго явилася еси, Отроковице непорочная, одушевлен Престол же и дверь; тем яко Царицу возлюбиша девы Тя, Дево, в след Тебе приведошася, Богоотроковице.

Ин

Ирмос: Проявленное на горе законоположнику во огни и купине * Рождество Приснодевы * в наше, верных, спасение * песньми немолчными величаем.

Воцарившася над страстьми терпением, Христос тя прият, Симеоне богоносе, Своему общнику Царству: тем тя песньми почитаем.

Целебней благодати сподобився от некрадомых Духа сокровищ, богоносе Симеоне, исцеления подаеши торжествующим память твою.

Возшед, преподобне, небеснаго течения на добродетельный воздух, страданьми препоясан, возлетев к скиниям небесным, моли спастися душам нашим.

Богородичен: Купина, горящая огнем и неопаляема, явилася еси, о Владычице, заченши безсеменно Бога и Спаса мира, Егоже непрестанно величаем.

Катавасия: Таин еси, Богородице, рай, * невозделанно возрастивший Христа, * Имже крестное живоносное на земли насадися Древо. * Тем, ныне возносиму, * покланяющеся Ему, Тя величаем.

Другий ирмос: Снедию древа роду прибывшая смерть * Крестом упразднися днесь, * ибо праматерняя всеродная клятва разрушися Прозябением * Чистыя Богоматере, * Юже вся Силы Небесныя величают.

Светилен индикта.

Подобен: Учеником:

Боже богов и Господи, * триипостасное Естество, * Непреступне, Присносущне, Несозданне * и всех Содетелю, Вседержителю, * Тебе припадаем вси и Тя молим: * настоящее лето сие яко Благ благословив, * сохрани в мире вся люди Твоя, Щедре.

Слава, преподобнаго.

Подобен тойже:

Якоже светило, преподобне, * светоносное твое житие облиставшее * просвети подсолнечную всю чудес лучами. * Столпом бо, отче, возшел еси, яко лестницею, к Богу, * идеже всех желаний, Симеоне, * конечное истинно восприятие есть, * о нас моляся, чествующих Тя, блаженно.

И ныне, индикта.

Подобен той же:

Содетелю и Правителю всея твари сый, * времена и лета положив в Твоей власти, * летний круг, благословеньми, Щедре, благости венчай, * в мире сохраняя Твоя люди невредны и целы, молимся, * молитвами Рождшия Тя и Божественных Ангел.

На хвалитех стихиры самогласны индикта, на 4.

Глас 3. Иоанна монаха:

Превечное Слово Отчее, * Иже во образе Божии сый * и составивый тварь из не сущаго во еже быти, * времена и лета в Своей власти положивый, * благослови венец лета благости Твоя, * даруя мир церквам Твоим * и победы православным христианом, * благоплодие же земли и нам велию милость.

Глас 4. Тогоже:

Царствие Твое, Христе Боже, * царство всех веков, * и владычество Твое во всяком роде и роде, * вся бо мудростию сотворил еси, * времена и лета нам предложив. * Темже, благодаряще о всех и за вся, вопием: * благослови венец лета благости Твоя * и сподоби нас неосужденно вопити Тебе: * Господи, слава Тебе.

Андрея Пирскаго:

Шествия Твоя, Боже, * шествия велия и чудна: * тем строения Твоего силу величаем, * яко Свет от Света пришел еси во окаянный мир Твой * и первую погубил еси клятву ветхаго Адама, * яко благоволил еси, Слове, * и нам мудростию времена и лета положил еси, * еже славити вседетельную Твою благодать: * Господи, слава Тебе.

Святых жен, глас 2. Германово:

Егда страстию Твоею, Господи, * вселенную утвердил еси, * тогда и немощствующии препоясаша силою, * жены мужествоваша на горчайшаго мучителя * и, побеждение матернее исправивше, * паки в сладости райстей быша, * в славу Твою, рождшагося от Жены * и спасаго род человеческий.

Слава, преподобнаго, глас тойже:

От корене благаго благий прозябе плод, * иже от младенства, священный Симеон, * благодатию паче неже млеко воспитан, * и, на камень тело возвысив, * к Богу же превозвысив разум, * Небесное созда добродетельми жилище, * и, с божественными Силами ликовне шествуя, * Христа бысть жилище, * Бога и Спаса душ наших.

И ныне, индикта. Глас 8. Германово:

Неизреченною мудростию * составивый всяческая, Слове, Христе Боже, * времена и лета нам предложивый, * дела рук Твоих благослови * и верныя люди Твоя силою Твоею возвесели, * подая им крепость, яко Един Благ и Человеколюбец.

Таже славословие великое.

И по Трисвятом тропарь индикта глас 2:

Всея твари Содетелю, * времена и лета во Своей власти положивый, * благослови венец лета благости Твоя, Господи, * сохраняя в мире люди и град Твой, * молитвами Богородицы, и спаси ны.

Слава, тропарь преподобнаго, глас 1:

Терпения столп был еси, * ревновавый праотцем, преподобне, * Иову во страстех, Иосифу во искушениях, * и бесплотных жительству, сый в телеси, * Симеоне, отче наш, * моли Христа Бога спастися душам нашим.

И ныне, Богородицы, глас 1:

Радуйся, обрадованная Богородице Дево, * пристанище и предстательство рода человеческого, * из Тебе бо воплотися Избавитель мира, * едина бо еси Мати и Дева, * присноблагословенная и препрославленная, * моли Христа Бога мир даровати всей вселенней.

Ектении, и отпуст, и час 1-й. На I -м часе тропарь индикта. Слава, святаго. И ныне, Богородичен часов. По Трисвятом кондак индикта и святаго глаголем прменяюще. И прочая, и совершенный отпуст.

НА ЛИТУРГИИ

Блаженны от канона индикта, песнь 3-я на 4, и преподобнаго, песнь 6-я на 4.

Утверди, Блаже, егоже насади любовию на земли десница Твоя, плодови т виноград, сохраняя Твою Церковь, Всесильне.

В делех духовных богокрасных красящихся наставшее, Господи, лето сие преведи, Владыко, иже верою Тя песнословящия, Боже всяческих.

Крепостию всеильною укрепляеми, противоборцев попрасте силу, сего ради яко победоносицы от Христа венчаестеся.

Явишася зверская зияния Божественною силою Христоваго недействительна: и избавистеся, богоносицы, невредимы, Бога почитающе.

Знамений и чудес тв Христо самодетеля показа, Божественнаго, блаженне, действия приятно жилище.

Вознесл еси тело твое, Симеоне, яко на крест, на столп. Тем прославился еси на Древо тебе ради вознесшемуся Христу.

Слава: **Вышнее** шествие обрет, Симеоне чудне, к высоте Небесней поющия тв верно возведи.

И ныне: Богородичен: **Гору**, Юже провиде Даниил, из Неяже несекомый Камень веры отсечеса, Христос, Тя познаваем.

По входе:

Тропарь индикта, глас 2:

Всея твари Содетелю, * времена и лета во Своей власти положивый, * благослови венец лета благости Твоея, Господи, * сохраняя в мире люди и град Твой, * молитвами Богородицы, и спаси ны.

Тропарь Богородицы, глас 1:

Радуйся, обрадованная Богородице Дево, * пристанище и предстательство рода человеческого, * из Тебе бо воплотился Избавитель мира, * едина бо еси Мати и Дева, * присноблагословенная и препрославленная, * моли Христа Бога мир даровати всей вселенней.

Тропарь преподобнаго, глас 1:

Терпения столп был еси, * ревновавый праотцем, преподобне, * Иову во страстех, Иосифу во искушениях, * и бесплотных жительству, сый в телеси, * Симеоне, отче наш, * моли Христа Бога спастися душам нашим.

Кондак преподобнаго Симеона, глас 2:

Слава: **Вышних** ищай, вышним совокупляйся * и колесницу огненную столп соделавый, * тем собеседник Ангелом был еси, преподобне, * с ними Христу Богу * моляся непрестанно о всех нас.

Кондак индикта, глас 2:

И ныне: В Вышних живый, Христе Царю, * всех видимых и невидимых Творче и Зиждителю, * Иже дни и нощи, времена и лета сотворивый, * благослови ныне венец лета, * соблюди и сохрани в мире град и люди Твоя, * Многомилостиве.

(Аще же храм Богородицы:

И ныне, храма Богородицы, индикта же кондак глаголи в начале.)

Прокимен индикта, глас 3: Велий Господь наш, и велия крепость Его, * и разума Его несть числа.

Стих: Хвалите Господа, яко благ псалом.

И преподобнаго, глас 7: Честна пред Господем * смерть преподобных Его.

Апостол к Тимофею, зачало 282:

Чадо Тимофее, молю прежде всех творити молитвы, моления, прошения, благодарения за вся человеки, за царя и за всех, иже во власти суть, да тихое и безмолвное житие поживем во всяцем благочестии и чистоте. Сие бо добро и приятно пред Спасителем нашим Богом, Иже всем человеком хочет спастися и в разум истины прийти. Един бо есть Бог, и един ходатай Бога и человеков, человек Христос Иисус, давый Себе избавление за всех, свидетельство времени своими, в неже поставлен бых аз проповедник и Апостол, истину глаголю о Христе, не лгу, учитель языков в вере и истине.

И преподобнаго, к Колоссаем, зачало 258:

Братие, облецытеся убо, якоже избранныи Божии, святы и возлюбленни, во утробы щедрот, благодать, смиренномудрие, кротость и долготерпение, приемлюще друг друга и прощающе себе, аще кто на кого имать поречение: якоже и Христос простил есть вам, тако и вы. Над всеми же сими стяжите любовь, яже есть союз совершенства. И мир Божии да водворяется в сердцах ваших, в оньже и звани бысте во едином теле: и благодарни бывайте. Слово Христово да вселяется в вас богато, во всякой премудрости, учаще и вразумляюще себе самех во псалмех и пениих и песнях духовных, во благодати поюще в сердцах ваших Господеви.

Аллилуия, глас 4: Тебе подобает песнь, Боже, в Сионе.

Стих: Благословиши венец лета благости Твоя, Господи.

И преподобнаго: Блажен муж, бояйся Господа, в заповедех Его восхощет зело.

Евангелие от Луки, зачало 13:

Во время оно, прииде Иисус в Назарет, идеже бе воспитан. И вниде, по обычаю Своему, в день субботный в синагогу, и воста чести. И даша Ему книгу Исаии пророка, и разгнув книгу, обрете место, идеже бе написано: Дух Господень на Мне, Егоже ради помаза Мя благовестити нищым, посла Мя изцелити сокрушенныя сердцем, проповедати плененным отпущение и слепым прозрение, отпустити сокрушенныя во отраду, проповедати лето Господне приятно. И согнув книгу, отдав слуге, седе, и всем в синагоги очи беху зряще Нань. И начат глаголати к ним, яко днесь сбьется писание сие во ушию вашу. И вси свидетельствовашу Ему, и дивляхуся о словесех благодати, исходящих из уст Его.

И преподобнаго: от Матфея, зачало 43:

Рече Господь Своим учеником: вся Мне предана суть Отцем Моим, и никтоже знает Сына, токмо Отец, ни Отца кто знает, токмо Сын, и емуже аще волит Сын открыти. Приидите ко Мне вси труждающиися и обремененнии, и Аз упокою вы. Возмите иго Мое на себе, и научитесь от Мене, яко кроток есмь и смирен сердцем, и обрящете покой душам вашим. Иго бо Мое благо, и бремя Мое легко есть.

Причастен: **Б**лагословиши венец лета **б**лагости Твоя, Господи.

Другий: **В** память вечную:

Дневный же Апостол и Евангелие вычитаем наперед.